



Uunga siunnersuut: Pisortat akiliisarneri il. il. pillugit Inatsisartut inatsisaat nr. xx, xx.xxx 2020-meersoq.
(Aningaasaqarnermut Naalakkersuisoq)
(siullermeerneqarnera)

Uuma siunnersuutip siunertaraa innuttaasunut suliffeqarfinnullu pisortat akiliisarnerisa ajornannginnerulersinnissaat. Nem-konto-p pisortaqaqfimmumut malunnartumik oqilisaasseqataanermik kinguneqarsinnaavoq, siunissami sipaaruteqarfiususaaq, suleriutsit assassorluni suleriutsinik ikinnerusunik ingerlatsinissamik kinguneqartussaammat, suliaassallu suliarineqarnerani innuttaasunut sukkanerulersitsillunilu pisariinnerulersitsissammat.

Demokraatit ukiorpassuarni siuttuusimapput, pisortaqaqfinni pisariillisaanissamut, aaqqissuussarli annikittunnguugaluartoq, siunnersuut taperserparput, ataatsimut isigalugu pisortat allattoqaqfiannit nutarterinerussammat digitalinngortitsinermut periarfissat ikiortigalugit.

Nunarsuarmi piffinni arlaqartuni suliniutit taamaattut takusinnaavagut, ineriartornerlu ataasiinnarmut sammiveqarpoq, tassalu digitalinngortitsineq, nutarterineq, aammalu imminut kiffartuunnerit amerlanerusut. Tamanna ineriartorneq malinnaaffigissallugu pingaartuuvoq, taamaattumillu nuannaarutigaarput, Naalakkersuisut nukippassuit atormatigit suliap uuma pilertortumik naammassinissaanut imaattumik siunnersuuteqarnermigut.

Tusarniaanermut akissuterpassuit tiguneqarsimapput maluginiarparpullu, Naalakkersuisut sapinngisamik tusaaniarsimammatigit tusarniaaffigineqartut ilaasa ernummateqarnerat, kisiannili suli periarfissaqartoq naleqqussaannissamut atortinneqalernissaanut suliniarnermi suleqataasussat tamaasa qanimut suleqatigalugit.

Neriuppugut atuutsinneqalernissaanut Naalakkersuisut suliniarnermi kommunit sapinngisamik qanimut suleqatigissagaat, taassuma aaqqissuussap kommunit innuttanut, pisortanit pisartagaqartunut, sullissinerannut tunniussassaannullu kinguneqartussaammat.

Taamatut oqaaseqarluta siunnersuut ataatsimiititaliami Aningaasaqarnermut- akileraartarnermullu ataatsimiititaliami sukumiisumik suliarineqarnissaanut ingerlateqqippaput siunnersuutip aappasaanik suliarineqannginnerani.